


## AKTIVNOSTI

Centar za socijalni rad Breza je Javna ustanova u državnoj svojini (od 1979. godine), sa svojstvom pravnog lica sa ograničenom odgovornošću za obavljanje djelatnosti kao što su: praćenje i proučavanje problema iz oblasti socijalne zaštite, neposredno pružanje oblika socijalne zaštite i usluga socijalnog rada, saradnja sa drugim ustanovama, preduzećima, organizacijama i udruženjima, te vrši stručne, upravne, finansijske i administrativne poslove u vezi sa sprovođenjem zakona o socijalnoj zaštiti civilnih žrtava rata i zaštite porodica sa djecom i Zakona o raseljenim licima, izbjeglicama i porodičnog zakona.

Imajući u vidu prisutnost problema i raspoložive pokazatelje, te uvažavajući utvrđene potrebe ciljnih grupa koje su identificirane, evidentno je da je u narednom periodu potrebno pronaći rješenje za iste, kako kroz svakodnevne aktivnosti, tako i kroz planirane projekte:

- Poboljšati sistem socijalne zaštite
  - ✓ Rješavanje zahtjeva za ostvarivanje prava u oblasti socijalne i dječije zaštite u prvostepenom postupku;
  - ✓ Rješavanje zahtjeva za ostvarivanje prava u oblasti zaštite porodice sa djecom;
  - ✓ Neposredno pružanje usluga socijalnog i drugog stručnog rada, savjetodavnih usluga i stručne pomoći pojedincima i porodicama;
  - ✓ Pripremanje i provođenje odgovarajućih oblika i mjera socijalne i porodično-pravne zaštite;
  - ✓ Otkrivanje i praćenje socijalnih potreba građana u cilju poduzimanja adekvatnih mjera njihove zaštite;
  - ✓ Razvoj i unapređenje preventivnih aktivnosti koje doprinose sprječavanju i suzbijanju socijalnih problema zajedno sa drugim vladinim i nevladinim organizacijama;
  - ✓ Vođenje evidencije i dokumentacije o korisnicima i realizovanim oblicima i mjerama njihove zaštite
  - ✓ Pružanje zaštite djeci bez roditeljskog staranja radi njihovog uspješnog zbrinjavanja, odgoja, obrazovanja i pripremanja za život i rad;
  - ✓ Obrada i davanje mišljenja sudovima u brakorazvodnim parnicama, davanje mišljenja za sklapanje braka maloljetnih lica, posvojenju i izdržavanju djece i drugi upravno pravni poslovi iz oblasti porodičnog prava, koji su Zakonom ili drugim propisima stavljeni u nadležnost.
  
- Poboljšati informisanje javnosti o socijalnim pravima i povećati nivo uključenosti socijalno najosjetljivijih kategorija u planiranje socijalne zaštite
- Unaprijediti mehanizme i jačati održiv sistem zaštite prava djece
- Unaprijediti socijalnu zaštitu marginaliziranih osoba i onih u riziku od marginalizacije

## Razrada ideje u projekat



Projektni ciklus je disciplina koja slijedi „životni vijek“ projekta od inicijalne ideje kroz realizaciju pa sve do kraja projekta, odnosno tačke obnavljanja projekta pod istim ili nešto izmjenjenim uslovima.

### Šta je to projekat?

- Sredstvo komunikacije sa donatorom vezano za predstavljanje i finansiranje projekata
- Ugovor koji obavezuje organizaciju da u potpunosti slijedi predložene aktivnosti, na koji se druga strana (donator) u svakom trenutku može pozvati
- Plan za narativno i grafičko prikazivanje aktivnosti koje mogu da dovedu do ispunjenja ciljeva

#### ➤ Idejni projekat: „Jačanje civilnog društva kroz promociju prava djeteta“

##### Opis problema:

Djeca se rađaju s temeljnim slobodama i pravima koja pripadaju svim ljudskim bićima. No, s obzirom na tjelesnu i psihičku nezrelost nameće se potreba isticanja posebnih prava djeteta na zaštitu koja proizilaze upravo iz te činjenice. Upravo je to osnovno polazište Konvencije o pravima djeteta. Djeci se mora omogućiti da aktivno sudjeluju u rješavanju svih pitanja koja utiču na njihov život i dopustiti im slobodu izražavanja mišljenja. Ona imaju pravo izreći svoja gledišta koja se moraju ozbiljno uzeti u obzir. Svjesne da u svakoj zemlji svijeta postoje djeca koja žive u izuzetno teškim uvjetima i da njima treba posvetiti posebnu pažnju. U svim akcijama koje su u vezi s djecom poduzimaju javne ili privatne ustanove socijalne zaštite, sudovi, državna uprava ili zakonodavna tijela, mora se prvenstveno voditi računa o interesima djeteta.

➤ **Idejni projekat: Promocija hraniteljstva na opštini Breza**

Opis problema:

Svako dijete je jedinstveno ljudsko biće sa punim ljudskim dostojanstvom i ima vlastita prava koja se moraju poštivati i unapređivati. Principi nediskriminacije i najboljeg interesa djeteta, te pravo na život, opstanak, razvoj i pravo na participaciju su osnovni principi na kojima počiva Konvencija o pravima djeteta. Nijedno pravo iz Konvencije ne može se u potpunosti uživati ako nisu zadovoljeni opšti/osnovni principi.

Dijete koje je trajno ili privremeno lišeno roditeljskog staranja biće smješteno u odgovarajuću porodicu ili ako je to neophodno, u ustanovu.

Imajući u vidu složenost koju implicira zbrinjavanje djece, savremena politika i praksa promoviraju kontinuirane programe edukacije hraniteljskih porodica, kojima se u najvećoj mjeri može osigurati profesionalnost u adekvatnom zbrinjavanju djeteta, uz uvažavanje njegovih individualnih karakteristika i potreba i poštivanje njihovih najboljih interesa. Učešće u kontinuiranoj edukaciji nije samo obaveza hraniteljske porodice, već i njihovo pravo, jer i edukacija je vid podrške pri ispunjavanju hraniteljskih obaveza.

Jedan od osnovnih ciljeva edukacije hranitelja i hraniteljskih porodica jeste prepoznavanje i daljnje razvijanje sposobnosti koje pojedinac već posjeduje za odgovarajuću brigu o djetetu. Edukaciju hranitelja treba posmatrati kao proces koji se odvija kroz posebno osmišljene trening programe i druge vidove podrške.

Izbor hranitelja je odgovoran i težak zadatak koji iziskuje rad stručnog tima kojeg čine socijalni radnik, pedagog, psiholog, pravnik, ljekar i drugi stručnjaci. Smještaj djeteta u porodicu može imati uspješne rezultate jedino ako je ta porodica pažljivo odabrana. Nije dovoljno samo naći porodicu koja je spremna primiti dijete. Ta porodica treba pružiti garanciju za ispravan, kompletan razvoj djeteta i da dijete bude voljeno od strane svih članova porodice. Dobro odabrana porodica može osigurati potpunu socijalnu integraciju djeteta, ne samo u porodici nego i u širem društvu, kao punopravnog i jednakog člana. Hraniteljstvo obezbjeđuje odrastanje u porodičnom okruženju onoj djeci, koja nisu u mogućnosti odrastati u vlastitoj porodici. Poznato je da su prednosti odrastanja u porodici suštinske, što je i osnovni razlog zbog kojeg se nastoji što veći broj djece bez roditeljskog staranja zbrinuti u okviru porodica.

Cilj promocije hraniteljstva jeste da se pomogne u sljedećem:

- Shvatanju šta hraniteljstvo podrazumjeva, te razumijevanju uloge, obaveza i prava hranitelja
- Upoznavanju sa potrebama i pravima djece
- Pripremi za preuzimanje hraniteljske dužnosti
- Sticanje potrebne sigurnosti u pogledu svoje uloge, kako u odnosu prema djetetu, tako i u odnosu sa drugim licima i institucijama u sistemu zaštite djece bez roditeljskog staranja
- Preuzimanju roditeljske uloge, onima koji nikada nisu imali vlastitu djecu;
- Razumjevanju sistema brige o djeci i njegovog načina funkcionisanja, upoznavanju sa ulogom ostalih lica (organizacija/institucija) u sistemu brige o djeci i uviđanju važnosti partnerstva sa akterima u procesu brige za dijete, u cilju maksimalne dobrobiti djeteta; upoznavanju sa praktičnim aspektima hraniteljstva.

- Dodatna korist od treninga jeste uspostavljanje čvršćih veza unutar grupe hranitelja, što podstiče daljnju razmjenu iskustva i međusobno pomaganje i podršku i nakon okončanja programa.

➤ **Idejni projekat: Izgradnja prostorija sa liftom za osobe s invaliditetom**

Opis problema:

Osobe sa invaliditetom se nalaze u izuzetno neravnopravnom položaju na druge građane, a barijere su prisutne u svim segmentima života. Za rješavanje bilo kojeg problema, osobe sa invaliditetom se upućuju u Ustanove socijalne zaštite, pokazujući tako da se upravo takve osobe tretiraju kao isključivo socijalne kategorije, iako bi uz uklanjanje barijera, mogli biti jednako korisni članovi društva.

Sve to podrazumjeva pristupačno okruženje-građevine, javne površine, usluge, komunikacije, informacije, tehnologije i ostalo, ali prije svega treba pokrenuti edukacije i kampanje na razvijanju svijesti svih članova zajednice, te uskladiti terminologiju koju je usvojio pokret osoba sa invaliditetom na Međunarodnom nivou.

Centar za socijalni rad bi implementacijom ovog projekta, tj. izgradnjom lifta za osobe sa invaliditetom, olakšao rad i poboljšao pružanje usluga svim građanima ravnopravno, obzirom da se prostorije Centra za socijalni rad nalaze na spratu zgrade koja je u ruševnom i veoma lošem stanju.

Projektom su obuhvaćene sve one osobe kojima je potrebna određena vrsta socijalne pomoći bez obzira na spol i starosnu dob. Na taj način osobe sa invaliditetom bi u potpunosti bile uključene u realizaciju svojih prava, bile bi uključene u život zajednice, što obuhvata i sudjelovanje u javnom, kulturnom i političkom životu, jer osobe sa invaliditetom moraju biti prisutne na mjestima i prilikama gdje se donose odluke, ne samo koje se odnose na njihov položaj, već i na odluke od značaja za društvo.

**Projekti na kojima se svakodnevno odvaja vrijeme radi njihove realizacije:**

1. Idejni projekat :“ Nabavka automobila za potrebe Centra za socijalni rad Breza“;
2. Idejni projekat :“ Pružanje pomoći starim i iznemoglim osobama tokom zimskog perioda“;
3. Idejni projekat :“Edukacija žene u ruralnim područjima s ciljem njenog osposobljavanja za rad“;
4. Idejni projekat :“ Sprovođenje istraživačkog projekta o vršnjačkom nasilju u školama Općine Breza“;